

दिनांक : 11.09.2026

समय : 18.45 बजे

आकाशवाणी जयपुर-अजमेर

प्रादेशिक समाचार

- प्रदेश मांय नगरीय निकाय चुनाव रा दूजा दौर मांय आज शांति सागे वोट पड़्या-वोटों री गिणती 14 सितम्बर ने करी जावेलां
 - भारत री सदरत अर मेजबानी मांय 18 वॉ ब्रिक्स शिखर सम्मेलन काल नई दिल्ली मांय सरू व्हेला-दुनिया रा केई खास नेता दिल्ली पूग्यां
- देश मांय आज फास्टैग पोर्टेबिलिटी सारू वन टैग सुबीतो सरू व्ह्यो
- प्रदेश रा कुछ हलकां मांय चौमासा री बिरखा ओजू सरू व्ही- काल 29 जिलां मांय बरसात रो येलो अलर्ट

000

प्रदेश मांय नगरीय निकाय चुनाव रा दूजा दौर रा चुनाव मांय वोट देवण रो काम अब ऊं थोडी देर पैली पूरो व्हे ग्यों ई रा तैत 147 निकायां मांय सिंज्या पांच बज्या ताई करीब 68 फीसदी वोट पड़्यां संवारे 07.00 बज्यां सरू व्ह्यो वोट देवण रो सिलसिलो सिंज्यां 06:00 बज्यां ताई मतदान केन्द्र मांय दाखिल व्हे जावण वाळां सारू चाल रह्यो हैं ई दौर मांय 6 नगर निगम, 20 नगर परिषद अर 121 नगर पालिकावां रा चुनाव सारू वोट पड़्यां शहरां री सरकार रा चुनाव सारू वोट देवण वाळां मांय खास उमाव निजर आयों दोपहरां पाछे 03:00 बज्यां ताई बाड़मेर जिला रा धोरीमन्ना मांय 85 फीसदी ऊं बत्ता वोट पड़ ग्या हां दोपहरां पाछे 03:00 बज्यां ताई उदयपुर जिला रा मावली मांय 80 फीसदी, जद के बाड़मेर जिला रा चोहटन मांय 78 फीसदी वोट पड़ ग्या हां खास नगर निगमां मांय शामिल अजमेर मांय दोपहरां 03:00 बज्या ताई सब ऊं कम करीब 48 फीसदी वोट पड़्यां महिलावां, वोट देवण वाळा नुवा लोगां अर बुजुर्गां समेत हर उम्र रा लोगां मांय वोट देवण रो उमाव निजर आयों

.....

.....

निकाय चुनाव रा दूजा अर आखिरी दौर मांय आज मुख्यमंत्री भजन लाल शर्मा जयपुर मांय जगतपुरा हलका रा एक मतदान केन्द्र मांय वोट दीनों ई मौके खबरनवीसां सागे बातचीत करता थकां वे एक राज्य एक चुनाव री सोच ने जनता रो भलो करण वाळी बतायीं दूजा दौर रो मतदान पूरो व्हेवण सागे ई 18 हजार 266 उम्मीदवारां रो सियासी भाग ई.वी.एम. मांय बंद व्हे ग्यों 09 सितंबर ने व्ह्या पहला दौर रा तैत 162 स्थानीय निकायां मांय 76 दशमलव 41 फीसदी वोट पड़्या हां कुल 309 निकायां मांय चुनाव सारू 38 हजार 929 उम्मीदवार चुनाव मांय हैं 76 वार्डां मांय

उम्मीदवार बिना चुणाव सगळां री एक राय ऊं चुणी ज्यां वोटां री गिणती 14 सितम्बर ने करी जावेलीं

000

प्रधानमंत्री नरेंद्र मोदी सोशल मीडिया पोस्ट रे जरिये भारत री सदरत अर मेजबानी मांय काल नई दिल्ली मांय सरू व्हे रह्या 18वां ब्रिक्स शिखर सम्मेलन मांय न्यारा-न्यारा मुद्दा माथे सकारात्मक अर सार्थक चर्चा व्हेवण री उम्मीद जतायी हैं शिखर सम्मेलन मांय ब्राजील, चीन, मिस्र, इथियोपिया, इंडोनेशिया, भारत, ईरान, रूस, सऊदी अरब, दक्षिण अफ्रीका अर संयुक्त अरब अमीरात समेत ग्यारह खास उभरती अर विकासशील माली व्यवस्थावां रा नेता एके सागे विचार करेलां नई दिल्ली रा भारत मंडपम मांय व्हेवण वाळा ब्रिक्स शिखर सम्मेलन रो मुद्दां **“लचीलापन, नवाचार, सहयोग और स्थिरता के लिए निर्माण”** राख्यी ज्यो हैं शिखर सम्मेलन मांय रूस रा राष्ट्रपति ब्लादिमीर पुतिन, चीन रा राष्ट्रपति शी जिनपिंग, दक्षिण अफ्रीका रा राष्ट्रपति सिरिल रामाफोसा, मिस्र रा राष्ट्रपति अब्दुल फताह अस्सीसी, इंडोनेशिया रा राष्ट्रपति प्राबोवो सुबियांतो, ईरान रा राष्ट्रपति मसूद पेजेशिकयन अर अबू धाबी रा युवराज शेख-खालेद-बिन-मोहम्मद-बिन-जायद-अल-नहयान समेत दुनिया रा केई नेता शामिल व्हेलां इथियोपिया रा प्रधानमंत्री आबी अहमद अली ई सम्मेलन मांय भाग लेवेलीं ई बीचे प्रधानमंत्री मोदी आज दोपहरां पाछे नई दिल्ली मांय रूस रा राष्ट्रपति ब्लादिमीर पुतिन सागे बातचीत कीनीं प्रधानमंत्री मोदी रो आज सिंज्यां ईरान रा राष्ट्रपति मसूद पेजेशिकयन सागे ई बातचीत करण रो कार्यक्रम हैं ई बीचे ब्रिक्स देशां रा वित्त मंत्रियां अर केंद्रीय बैंक रा गवर्नरां री मुंबई मांय व्ही मीटिंग मांय टैरिफ अर गैर-टैरिफ अडचनां समेत एकतरफा कारोबार अर माली उपाय लागू करण माथे गंभीर चिंता जताई ज्यीं सदस्य देश डब्ल्यूटीओ ने ध्यान राखता थकां स्वतंत्र, पारदर्शी अर नियम-आधारित बहुपक्षीय व्यापार व्यवस्था री हिमायत दोहरायीं

00000

प्रधानमंत्री नरेन्द्र मोदी कह्यो हैं के आतंकवाद रो बदलता रूप मांय खतरा लगातार बध रह्यो हैं पण भारत रो इण रा सगळा रूपां रे खिलाफ लड़ाई रो संकल्प अडिग हैं अमरीका मांय 11 सितंबर 2001 ने व्हा आतंकवादी हमलां री 25वीं बरसी रे मौके सोशल मीडिया पोस्ट रे जरिये श्री मोदी कह्यो के आतंकवाद आखी दुनिया मांय अनगिनत लोगां री जान लीनी हैं वे कह्यो के सरहद पार ऊं आतंकवाद री जद मांय आयो भारत दशकां ऊं इण रे खिलाफ लड़ाई मांय आगे रह्यो हैं

0000

सड़क परिवहन अर राजमार्ग मंत्री नितिन गडकरी आज मुंबई मांय फास्टैग पोर्टेबिलिटी सारू **वन टैग** सबीता री सरूआत कीनीं ई रा तैत गाड़ी रो मालिक मौजूदा फास्टैग ने राजमार्ग यात्रा ऐप रे जरिए नुवा बैंक खाता ऊं जोड़ सके हैं ई मौके गडकरी कह्यो के टोल प्लाजा माथे इंतजार 10 सेकंड ऊं कम करणो पड़े, सरकार चालू माली साल रा आखिर ताई ऐड़ी व्यवस्था माथे खास ध्यान दे रही हैं

.....

000

सवाईमाधोपुर जिला मांय रणथम्भौर रो नामी त्रिनैत्र गणेश मेळो काल सरू व्हेलां तीन दिन रा ई मेळा मांय जातरूआं री मोटी तादाद मांय आमद-रपत रा आसार ने ध्यान राखता थकां पुलिस प्रशासन री ओर ऊं पुख्ता बन्दोबस्त करी ज्यो हैं जिला कलेक्टर कानाराम बतायो के मेळा मांय साफ-सफाई माथे खास ध्यान दियो जावेला अर सिंगल यूज प्लास्टिक अर डिस्पोजेबल सामग्री काम नी ली जा सकेलां

.....

00000

राज्य मांय चौमासा री बिरखा बेगी ई ओजू सरू व्हेवण रा आसार हैं मौसम विभाग रे मुजब राज्य रा ऊगणी अर लंकाऊ हलका मांय कटे-कटे बिरखा व्हे सके हैं बारिश रो ओ सिलसिलो 15 सितम्बर ताई चालतो रेहवण री संभावना हैं काल 29 जिलां मांय बरसात रो येलो अलर्ट जारी करी ज्यो हैं ई बीचे आज दोपहरां पाछे भरतपुर मांय डोढ़ घंटा ताई झमाझम मेह बरस्यो बारां मांय ई दोपहरा पाछे थोडी देर ताई जोरदार बिरखा व्हीं राजधानी जयपुर मांय ई कटे-कटे छांटो छिडको व्ह्यो लारला 3-4 दिन ऊं बिरखा नी व्हेवण ऊं पारो चढ़बा लाग्यो हैं पिलानी मांय पारो 40 डिग्री सेल्सियस ताई पूग ग्यो 10 ऊं बत्ती ठोड़ा अधिकतम तापमान 36 ऊं 39 डिग्री सेल्सियस बीचे चाल रह्यो हैं श्रीगंगानगर, बाड़मेर, जैसलमेर, बीकानेर, चूरू अर झुन्झुनू समेत केई ठोड़ा पारो 37 डिग्री सेल्सियस कने पूग ग्यो मौसम विभाग आवता दो सप्ताह प्रदेश मांय अधिकतम तापमान सामान्य ऊं ऊंचो रेहवण रा आसार हैं

0000

बालोतरा जिला मांय गुढामालानी-रतनपुरा गेला माथे एक कार अर गाडी री आमी-सामी री टक्कर रे कारण कार मांय सवार एक ही पिरवार री दो महिलावां री मौके ई मौत व्हे गयी, जदके 5 जणा जखमी व्हे ग्यां जोधपुर जिला मांय शेरगढ़ कने भूंगरा मेगा हाईवे माथे बीती रात पैदल रामदेवरा जा रह्या जातरूआं रे एक बेकाबू कार री फेंट मांय आ जावण ऊं तीन जातरूआं री मौत व्हे गयीं शेरगढ़ रा थानाधिकारी बतायो के ऐ लोग नाथासर गांव रा रहवासी हां राजधानी जयपुर रा करधनी हलका मांय एक मकान ऊं एक महिला अर तीन टाबरियां री लाशां बरामद करी ज्यीं जयपुर पश्चिम रा पुलिस उपायुक्त प्रशांत किरण बतायो के सरूआती जांच मांय पिरवार रा मुखिया कानी ऊं आ वारदात करण री जाणकारी मिली हैं पुलिस मामला री जांच कर रही हैं

000

प्रधानमंत्री नरेन्द्र मोदी 27 सितम्बर दीतवार ने आकाशवाणी ऊं प्रसारित कर्या जावण वाळा खास कार्यक्रम "मन की बात" मांय विचार बतावेलां आ हर महीना प्रसारित कर्या जावण वाळा ई कार्यक्रम री 138वीं कड़ी व्हेलां ई सारू आप ई मुफ्त नम्बर 1800-11-7800 माथे 25 सितम्बर ताई राय दे सको हों नरेन्द्र मोदी एप अर माय जीओवी ओपन फोरम रे जरिये ई विचार भेज्या जा सके हैं

000